

# NAMAZI

## Fëmijë të Dashur;

Një nga adhurimet më të rëndësishme që All-llahu i Madhëruar na kërkon të bëjmë është falja e namazit. All-llahu i Madhëruar na ka tërhequr vëmendjen, duke na thënë **“Falemi namazin ashtu siç duhet”** dhe **“Tregoni kujdes ndaj namazeve”**.

Pejgamberi jonë i nderuar Hazreti Muhammed Mustafa (sal-lall-llahu alejhi ve sel-lem) ka thënë: **“Namazi është shtylla e fesë”**. Duke falur namazin, e mbajmë të shëndoshë fenë dhe forcojmë akoma edhe më shumë besimin tonë.

Rruga për të fituar xhenetin kalon nëpërmjet namazit. Sepse Pejgamberi jonë ka thënë: **“Çelësi i Xhenetit është namazi”**. Namazi është urdhëri i All-llahut, prandaj falja e tij është obligim për çdo Musliman. Çdo ditë duhet të falim pesë kohë namaz. Këto janë: namazi i Sabahut (mëngjesit), i Ylesë (drekës), i Ikindisë (mbasdites), i Akshamit (mbrëmjes) dhe i Jacisë (darkës).



## Përpara se të fillojmë namazin:

- Marrim abdest. Pa abdest nuk mund të falim namaz.
- Tregojmë kujdes që vendi ku do të falemi dhe rrobat që kemi veshur të jenë të pastra.
- Vishemi në mënyrë të tillë që të mbulojmë të gjitha pjesët e duhura të trupit.
- Drejtohem nga “Qabeja”, e cila është kibla jonë.
- Namazin e falim në kohën e duhur, nuk e lejmë të kalojë kohën e namazit.
- Bëjmë njet për namazin të cilin do të falim.

Tani le ta mësojmë së bashku se si falet namazi . . .

## Tekbiri Fillestar

Farzi i parë që duhet të bëjmë kur falim namaz, është **“Tekbiri Fillestar”**. Tekbiri Fillestar bëhet duke thënë **“All-llahu Ekber”**. Ngritja e duarve ashtu siç tregohet në figurë, është suneti i Pejgamberit tonë.


Me bërjen e tekbitit fillon dhe falja e namazit.

Gjatë namazit duhet të kemi parasysh se kemi dalë përpara All-llahut, i cili na ka krijuar nga asgjëja dhe të gjitha veprimet i bëjmë me përulësi. Përqëndrohemi vetëm tek namazi dhe nuk mendojmë asgjë tjetër.

“All-llahu Ekber”, do të thotë: “All-llahu është më i madhi.”



“Namazi e largon  
njeriun nga shturja  
dhe nga të gjitha  
veprat e shëmtuara.”  
(Sureja Ankebut, Ajeti 45)



## Kijam (Qëndrimi në këmbë)

Farzi i dytë i namazit është kijam, pra qëndrimi në këmbë. Pas Tekbirit fillestar i lidhim duart siç tregohet në figurë dhe lexojmë, Subhaneken, Fatihanë dhe disa ajete nga Kur’ani Kerim. Këndimi i këtyre është farzi i tretë i namazit. Kjo quhet “**Kiraat**” (Këndimi i Kur’anit të madhërueshëm me zë).

Fëmijë!  
Mësimi përmendësh i  
sureve të shkurtëra në  
fund të Kur’anit Kerim,  
është më e lehtë.

Namazi është një adhurim tepër serioz. Nuk duhet të harrojmë që gjatë namazit jemi në prani të All-llahut dhe nuk duhet të mendojmë asgjë tjetër përveç ajeteve që këndojmë.